

**Asunto:** Alegacións a todos os documentos sometidos a información pública relativos ao Parque Eólico Valdepereira situado nos termos municipais de Lalín (Pontevedra) e O Irixo (Ourense) e á súa infraestrutura de evacuación por resolución do día 1 de marzo de 2022 (DOGA N. 57 do 23 de marzo de 2022). (expediente IN661A DXIEM-05/11).

Don/Dona \_\_\_\_\_ con DNI. Número \_\_\_\_\_, con domicilio a efectos de notificacións en \_\_\_\_\_, Concello de \_\_\_\_\_, Código Postal \_\_\_\_\_, provincia \_\_\_\_\_, teléfono \_\_\_\_\_ correo electrónico \_\_\_\_\_.

**EXPÓN:**

Á vista da Resolución do 1 de marzo de 2022, da Dirección xeral de Planificación Enerxética e Recursos Naturais, pola que se someten a información pública diversa documentación do proxecto de instalacións do parque eólico Valdepereira entre os Concellos de Lalín e O Irixo (expediente IN661A DXIEM-05/11), por medio do presente escrito realízanse as seguintes

**ALEGACIÓNS:**

**PRIMEIRA.- VULNERACIÓN DE DEREITOS FUNDAMENTAIS.** Esta segunda exposición pública nos Concellos incumpre tamén a normativa (artigos 143 e 144 do Real Decreto 1955/2000, de 1 de decembro, por el que se regulan las actividades de transporte, distribución, comercialización, suministro y procedimientos de autorización de instalaciones de energía eléctrica) a documentación mínima non está exposta. O proxecto non está visible no taboleiro de anuncios dos Concellos afectados e tampouco na súa sede electrónica nin páxina web. Non se indica nada das alegacións xa presentadas.

**SEGUNDA.- AUSENCIA DE UTILIDADE PÚBLICA DO PROXECTO.** O proxecto vai a incentivar o éxodo poboacional, non vai a xerar emprego nin a fixar poboación na zona, deixando graves prexuízos para as persoas que alí viven e as compensacións que se lles ofrecen son ridículas. O suministro eléctrico xa está asegurado.

**TERCEIRA.- O PROCEDEMENTO NON RESPECTA OS PRINCIPIOS DE OBXECTIVIDADE, PROPORCIONALIDADE, TRANSPARENCIA, IGUALDADE E NON DISCRIMINACIÓN.** O Consello da Cultura de Galicia solicitou unha moratoria na autorización dos parques eólicos ao estimar que están en trámite a concesión de 275 parques eólicos coas correspondentes liñas de evacuación. Hai un desenvolvemento anárquico e ao marxe da avaliación ambiental estratéxica do sector eólico en Galicia e as correspondentes liñas eléctricas de evacuación como a deste proxecto fronte ao que alegamos.

**CUARTA.- O PROXECTO PRESENTADO INCORRE EN FRAUDE DE LEI.** Hai FRAGMENTACIÓN FRAUDULENTE DUN PARQUE EÓLICO ÚNICO EN DOUS. É máis que evidente que os parques eólicos de Valdepereira e Pico Seco son unha única instalación. A empresa promotora de xeito fraudulento presenta dous proxectos separados para vulnerar a normativa evitando a suma dos seus megavatios cambiando así a administración competente e polo tanto actuando en fraude de lei. Isto supón que: O PROXECTO DEBE SER RETIRADO DE XEITO DEFINITIVO. En ocasión as operacións de fragmentación artificial de proxectos de parques ou de liñas de evacuación teñen por finalidade evitar a competencia autorizatoria do Ministerio a favor da competencia da administración autonómica. E en todo caso, cando se fragmentan os proxectos eólicos, sexa pola razón que sexa, minóranse as garantías de protección ambiental, ao aniquilar a posibilidade de avaliar conxuntamente aqueles proxectos artificialmente divididos. Que a fragmentación artificial ou de conveniencia deste tipo de proxectos non se axusta a Dereito é unha realidade que veñen corroborando os tribunais de xustiza en España dende hai anos. É evidente que non estamos ante proxectos independentes e plenamente funcionais de xeito illado. Estas Instalacións e a súa liña de evacuación, a Liña de Conexión Beariz 400 kV –Eixo Este, é intrínseca alomenos a 25 parques eólicos e tal vez máis, polo tanto, debería analizarse conxuntamente en todo o procedemento de avaliación ambiental. Os proxectos dos parques eólicos e as liñas de evacuación deben ser contemplados como un conxunto integrado nun mesmo proxecto. Non é de recibo sortear a través dunha máis que utilizada fragmentación, uns efectos sinérxicos e acumulativos ausentes nos estudos de impacto ambiental e nas declaracións de impacto ambiental.

**QUINTA.- AFECCIÓN ÁS PERSOAS.** Afección severa aos núcleos de poboación e ao benestar das familias que habitan neles. Excesiva proximidade dos aeroxeneradores e da liña eléctrica de evacuación ás vivendas e aldeas. Non se valora suficientemente o impacto sobre a calidade de vida das persoas que estarían expostas ao ruído dos aeroxeneradores, ao efecto sombra e as radiacións procedentes de tendidos eléctricos. No documento “Alcance de Estudo Ambiental de Proxecto de Parque Eólico Terrestre”, decembro de 2020, elaborado pola Rede de Autoridades Ambientais constituída a proposta da Comisión Europea e coordinada polo Ministerio para a Transición Ecolóxica e o Reto Demográfico,

**recoméndase evitar parques e subestacións a menos de 2 km** de núcleos habitados. Nos parques eólicos de Valdepereira e Pico Seco quedan seriamente afectados os seguintes núcleos de poboación: Ermida do Medio quedaría a 480 metros dun aeroxenerador. A situación deste lugar é especialmente afectada pois xa hai outro parque eólico en funcionamento que ten un aeroxenerador a 530 metros polo que a xente que vive neste lugar quedará seriamente afectada. Samprizón quedaría a 680 metros dun aeroxenerador. Trabazón quedaría a 510 metros dun aeroxenerador e a 560 metros doutro e polo tanto gravemente afectado. Ermida do Fondo quedaría a 980 metros dun aeroxenerador e a 1100 metros de outro. Sidre a 1160 metros dun aeroxenerador. Froufe queda a 610 metros dun aeroxenerador. Silvares quedaría a 490 metros dun aeroxenerador. Cebral a 710 metros dun aeroxenerador. Surribas a 890 metros dun aeroxenerador. Frixe a 1100 metros dun aeroxenerador. Nabás a 690 metros dun aeroxenerador. Parada de Labiote a 1200 metros dun aeroxenerador.

**SEXTA.- AFECCIÓN ÁS ACTIVIDADES AGROGANDEIRAS.** Falta a avaliación do impacto do proxecto sobre as zonas de produción agrícola e gandeira. No perímetro dos parques eólicos e nas súas proximidades existen actividades gandeiras principalmente de produción de carne que se verían moi afectadas por esta instalación. Igualmente afectaría a actividade agraria e gandeira para o autoconsumo. O mesmo pasa coa produción doutros produtos agroalimentarios como por exemplo o mel.

**SETIMA.- AFECCIÓN AO MONTE E AS EXPLOTACIÓNS FORESTAIS.** Non se analiza o impacto económico e social sobre os montes e as explotacións forestais na área de afección do proxecto. Cómpre por de manifesto que dita eiva resulta singularmente significativa e grave, toda vez que os rendementos medeireiros constitúen una importante fonte de ingresos para as economías das familias locais. A poligonal dos parques eólicos ocupa terreos de varias Comunidades de Montes co menoscabo para estas entidades. Ademais incrementa exponencialmente o risco dos incendios forestais. O artigo 59 da Lei 7/2012, de 28 de xuño, de montes de Galiza prohibe o cambio de uso forestal dos terreos queimados, por 30 anos. Parte da poligonal destes parques eólicos sitúase en terreos que sufriron incendios forestais.

**OITAVA.- AFECCIÓN AO MEDIO AMBIENTE.** Colisión frontal do proxecto cos obxectivos da estratexia da Unión Europea sobre a biodiversidade. O estudo de impacto ambiental non cumpre con todos os requisitos establecidos na Lei de Avaliación Ambiental. Tampouco se avalía de maneira obxectiva a alternativa 0 en relación a tódolos aspectos ambientais e sociais. Afección directa e indirecta sobre os espazos naturais protexidos pois os parques eólicos están próximos aos espazos naturais como son a ZEC Serra do Candán, ZEC Serra do Cando e ZEC Pena Veidosa. Cómpre ter en conta que a Rede Natura 2000 localízase practicamente á beira das instalacións. A instalación dos parques eólicos producirá impactos significativos sobre a fauna e flora da súa contorna. Prexuízos irreversibles para o lobo. Afección severa a especies endémicas en perigo de extinción ou vulnerables. Impacto severo sobre a avifauna e elevado risco de colisión das aves cos aeroxeneradores. Afección moi severa e prexuízos significativos para os recursos hídricos. Vulneración flagrante da Directiva Marco da Auga e ausencia dun estudo hidrolóxico. Afección severa e prexuízos irreversibles para o sistema de brañas e humidais da zona de afección do proxecto.

**NOVENA.- AFECCIÓN AO PATRIMONIO CULTURAL.** Afección severa ao patrimonio cultural e arqueolóxico e a súa descontextualización. Afección a bens culturais catalogados. Afección ao Conxunto Etnográfico do Foxo do Cabrito. **O estudo patrimonial da promotora é moi deficiente.** A promotora obvia o impacto sinérxico sobre o patrimonio da totalidade dos parques eólicos e as súas infraestruturas de evacuación. Non cabe pois descontextualizar o patrimonio cultural nin desvencellalo da paisaxe como se fai no estudo de impacto ambiental. O patrimonio cultural inmaterial queda sen avaliar. O anexo de patrimonio non recolle o lugar de interese xeolóxico, patrimonial e paisaxístico de pena algura. O estudo de impacto non menciona ou simplemente omite a presenza de outros bens catalogados nas proximidades que resultarán afectados. Tampouco se avalía o impacto sobre os Camiños Históricos existentes na zona, entre eles **o Camiño de Santiago da Xeración Nós**.

**DÉCIMA.- AFECCIÓN MOI SEVERA Á PAISAXE.** Afección severa e prexuízos irreversibles para as Áreas de Interés paisaxístico da contorna do proxecto. Grande impacto sobre numerosas rutas de sendeirismo existentes na contorna. Afección severa á rede de miradoiros existentes próximos á liña de alta tensión que se proxecta.

#### **SOLICITA:**

O rexeitamento da autorización administrativa e a non construción do proxecto do Parque Eólico Pico Seco situado nos termos municipais de Lalín (Pontevedra) e O Irixo (Ourense) e á súa infraestrutura de evacuación (expediente IN661A DXIEM-04/11), por incumprir a legalidade, pola invalidez do documento ambiental, e pola ausencia de utilidade pública.

En Lalín, a día 2 de maio de 2022

Asdo.-